

李文忠公奏稿

李文忠公奏稿

卷之三十二 目錄

勘驗英廠購到四船片

光緒四年六月十七日

奏留鄭藻如片

光緒四年六月十七日

丁肅昌請緩

陛見片

光緒四年六月二十九日

軍火畫一辦法

並報銷口令事宜摺

光緒四年七月初二日

請豁免民欠片

光緒四年七月初二日

四成稅留充機局經費片

光緒四年七月初二日

防營無庸撥換片

光緒四年七月二十三日

燒鍋存糧無庸收買片

光緒四年七月二十三日

秋禾望收無庸勸貸片

光緒四年七月二十三日

口外捐牛請獎片

光緒四年七月二十三日

外省捐局變通整頓摺

光緒四年七月二十三日

葉廷眷會辦招商局片

光緒四年七月二十三日

淮軍裁勇就餉摺

光緒四年八月十八日

李鳳苞兼管學生采辦等事片

光緒四年八月十八日

津局續收膏賑數目摺

光緒四年八月十八日

韓超請宣付史館摺

光緒四年八月十八日

燒鍋開禁片

光緒四年八月二十九日

淮軍軍需報銷摺

光緒四年八月二十九日

淮軍交涉洋務報銷片

光緒四年八月二十九日

蘆鹽加價展限摺

光緒四年八月二十九日

蘆鹽正課撥徵摺

光緒四年八月二十九日

桐城吳汝綸編錄

勘驗英廠購到四船片

光緒四年六月十七日

再臣於光緒元年三月與總稅務司赫德議訂英國阿摩士莊廠二十六噸半礮之船二隻三十八噸礮之船二隻專備海防要用該四船先後來華名以龍驤虎威飛霆策電等字樣適前福建撫臣丁曰昌以臺灣防務喫緊商調龍驤虎威二船駐防澎湖其飛霆策電到閩後經船政大臣吳贊誠選派管駕募配舵勇水手督飭各官弁認真操練並因該四船在洋年餘海水浸漬船底閒有雜物黏連本年春閒悉令上陽刮洗加油仍將輪機鍋鑪重加修整派令直隸候補道許鈴身督押該船於五月閒駛抵天津海口臣卽於六月初一日馳往大沽初二三日督同許鈴身及管駕官

游擊張成等逐細勘驗其輪機器具等件均尙精緻靈捷演試大礮亦有準頭隨令駛出沽口洋面往返兩時順水逆風每點鐘約行二十一里有奇若開滿輪力速率當可略加前准總理衙門面商以此等船隻宜動而不宜靜駕船之人宜勞而不宜逸洵爲切要機宜臣現籌派該四船分駐大沽北塘兩海口與陸營礮臺將領互相聯絡考究礮法每月各出洋會哨兩次練習風濤循環輪替調紫並按季合操打靶測度較準各船暫留洋弁二人幫同教練仍令許鈐身隨時查察照料精益求精以免疲弊上年兩江督臣沈葆楨會緘商分撥俾固江防正以船少不敷調撥爲慮昨總理衙門來函亦謂此項船隻無論各海口難資分布卽咽喉要區根本重地尙恐不敷與臣意見相合今察看該船巨礮實足以制鐵甲守護海口最爲得力必應及時添置臣已飭津海關稅務司

德璫琳由電報轉致赫德就近確詢英廠現時船礮價目有無低昂俟其回信若何再行酌量定購理合據實陳明伏乞  
聖鑒訓示謹

奏

奏留鄭藻如片

光緒四年六月十七日

再查存記海關道選川知府鄭藻如於本年正月欽奉

諭旨送部引

見旋卽赴都蒙

召見一次奉

旨著仍回江蘇當差欽此該員篤實廉幹德器深厚識略宏通於洋務涉歷已久臣所素知津郡爲通商總匯要口洋務海防在在需人助理鄭藻如前在上海總理機器局務臣沈葆楨已派員接辦其於蘇省並無另有經手事件合無仰懇

天恩准將該道留津差遣以資指臂附片具陳伏乞

聖鑒訓示謹

奏

丁壽昌請緩

陛見片

光緒四年六月二十九日

再署津海關道新授直隸臬司丁壽昌奏請

陛見已蒙

俞允自應交卸晉京惟天津辦理直晉豫賑捐轉運事宜均係該司會督各員籌辦頭緒甚繁責任綦重現值青黃不接之際窮黎待哺嗷嗷正須廣籌捐運接濟民食山西尤指天津一路爲辦賑樞紐曾國荃來函商請奏留該司暫緩北上臣維賑務最關重要該司兼營並顧措理裕如諸臻妥速自應責成一手經辦俟秋後轉運完竣賑捐就緒再令交卸展

覲飭赴臬司新任理合附片陳請伏乞

聖鑒訓示謹

奏



軍火畫一辦法並報銷口令事宜摺

光緒四年七月初二日

奏爲購製外洋軍火遵議畫一辦法並議報銷口令各事宜恭摺  
覆陳仰祈

聖鑒事竊臣等承准軍機大臣字寄光緒四年二月十四日奉

上諭總理各國事務衙門奏購製外洋軍火請飭妥議畫一辦法  
一摺外洋鎗礮名目甚多必須擇其最精之品一律覈實購辦現  
在各省所購多不一律卽一省亦不一律無論良莠雜收未必皆  
爲利器而各省不能通用設遇有事誠恐受累且委員每視爲利  
藪以劣充良不復認真挑選虛耗鉅款著專派精明廉正之員總  
司其事凡各省委購軍火責成該專派委員覈定儘有不堪施用  
及浮圖開銷等弊卽將該員與承辦之員分別勒追治罪其應如  
何遴員並各省如何統歸一律著李鴻章沈葆楨會商妥議奏明

辦理至上海天津設立機器局應否於兩局內遴派得力專員統  
令隨時酌覈畫一辦理著該大臣等一併妥議籌辦該局用款奏  
銷嗣後並著將每年每款需費若干逐細登明每年成造各件暨  
撥用存留各數目亦卽按件造報以昭覈實片奏洋鎗隊口號  
改用中國語言著該大臣等選派精通洋語之人將教練口號全  
用中國語言文字譯成一書其教法爲語言所不能傳者並繪圖  
輔之頒發各軍營俾將弁等隨時觀聽人皆通曉期於防務有裨  
等因欽此仰見

朝廷慎重海防實事求是至意欽悚莫名臣等公同籌議竊謂鎗  
礮爲制敵利器必須精良畫一各省各營皆能通用庶免臨事窒  
礙從前軍務孔亟利在應急隨購隨用無暇通籌迨同治四年開  
始設機器局仿造外洋軍火近年直隸江南籌辦海防所用鎗礮

又定造於外國著名之廠寬以時日俾期堅精茲奉

諭旨飭籌畫一辦法臣等謹將外洋鎗礮製造之法施用之宜先

陳其略查礮位一項德國全用後膛英國全用前膛俄法則小礮

多後膛大礮多前膛美國仍用老式滑膛其中著名商廠德曰克

鹿卜專造後膛全鋼之礮英曰阿勿士莊專造前膛熟鐵包鋼之

礮又有瓦瓦司廠兼造前膛後膛以鋼包鋼之礮論攻堅致遠前

膛不若後膛論穩固經久後膛不若前膛故行仗小礮宜用後膛

取其輕而及遠輪船礮臺所用大礮究以前膛爲宜此洋礮之大

略也洋鎗一項自有後門鎗式而前門之鎗洋人幾不過問其最

著名者英曰馬梯呢美曰林明敦德曰茅塞法曰沙賽卜近有沙

布一種亦出美國皆屬後門並爲各國推重究之命中致遠後門

雖倍勝於前門而前門子藥可以取辦臨時事易工省後門鎗子

必須造以機器工費既鉅猝辦尤難子藥不繼卽成棄物現就大勢而論海防若有戰事非後門最精之鎗弗能制勝若平時操練除後門鎗隊演習有年應仍其舊此外暫宜操以前門俾習手法而期節省此洋鎗之大略也目下中國力圖自強軍火利器貴一貴精洵爲確切不易之論上海一隅洋商匯萃日趨巧猾往往式樣雜出以劣充良各省采辦人員或受其欺或中其餌均所難保茲欲遴派精明廉正之員專任稽查采購未始非執簡馭繁之一策惟專派之員身居中土於外洋造法之新陳時價之長落未必纖悉週知近日洋商每有逕赴各省議價攬購者更屬無從節制委員權力有限辦理慮難經久伏查上年候選道李鳳苞帶領福州船政學徒赴英法兩國練習並鴻章曾令其訪求新出最精洋鎗擬與閩省酌量合購去冬接該道函稱法國水師於今春比試

各國後門鎗式俟比試後擇最精者寄回察看茲擬併仿該道親  
歷各廠確查前後膛大小礮之最精者擇尤開報並將圖樣價單  
寄閱俟核明定式隨時咨總理衙門暨各省遇有購用卽令該  
道照式在洋議購匯款定造一手經理上海地方祇須派員設局  
專司匯寄價銀驗收轉運等事如閩粵兩省無庸取道上海者卽  
自行匯價驗收李鳳苞精細廉正近於軍械一道刻意講求其不  
時分赴各國照料學徒以之兼辦軍火勢固甚便他日該道回華  
另飭別員接辦與從前無人出洋限於耳目者難易懸殊儼或辦  
理貽誤自可執法從事此議購軍火之畫一辦法也獨是軍火固  
貴一律而目前所有者如何酌劑異日續添者如何儲積尤須全  
局通籌始足備緩急而圖久遠卽以直隸江南計之除外洋老式  
鎗礮外近年所購新式前膛後膛大小洋礮不下四百五六十尊

所購所製之新式後門洋鎗不下二萬數千桿此皆得用利器爲  
向來各省軍營所未有費款數百萬用心十餘年始能積有成數  
前項礮位業經分撥礮臺輪船及海防各營果能加意珍惜自堪  
久而不做前項鎗枝各營領操者十之七積存備撥者十之三現  
擬已發之前後門洋鎗照舊留營操演將來續購畫一新鎗祇可  
存俟臨事應用惟子彈一項設礮之命脈無子彈則礮礮虛設  
後門子彈工繁費鉅遇有戰事十年之蓄尙恐不敷數月之需現  
查津滬兩機器局所製子彈數非不多而以之應操則有餘以之  
備戰則尙少亟應及時設法添製以防未然兩局製造之事向來  
互相考較亦互相撥用聲息素通以後每成軍火祇宜抽送臣等  
查驗嚴定等差力求精進似無庸另派專員監察致涉紛擾此外  
江甯機器局係臣鴻章勦捻時添設亦與津滬兩局通力合作其

山東湖南四川等省現既設局所製之器並應彼此互證以泯各師各式之偏以聯各省各軍之氣嗣後考定西洋最精鎗礮陸續酌購必須兼購造子機器豫籌造子經費其前項已有之新式鎗礮多年積累費款極鉅大約將來續購者亦不出南北洋現有各種之內自宜照舊兼用庶幾緩急足恃此議製軍火及豫籌全局之辦法也至機器局歲銷用款一節津局向製火藥銅帽水雷土乃得後門鎗及後門鎗子前膛後膛礮子滬局向製輪船火藥前膛洋礮後門洋鎗及後門鎗子前膛後膛礮子近因接船經費咸耗二成洋稅之半暫議停造輪船增造熟鐵包鋼大礮此兩局者目下製器甚繁而子藥爲軍火大宗尤須全力辦理蓋就現有之鎗礮籌應用之子彈核之外洋購價已需數百萬金鉅款固難驟籌亦斷無仰給外人之理祇得就已設之局額領之款分年起造

免致另行請撥貽誤要需兩局向領洋稅銀兩皆擇妥員經理毫無虛糜實用實銷開單奏報仍分別軍火船隻機器等門逐項開列茲若將每年每款需費若干逐細造冊報部有同一工料而前後時價不齊有製一器件而彼此精粗互異或先後成毀幾經更易工費多少不等徒敢更胥挑駁需索之端他日非勉強牽湊分洒勻攤變成例價不止名似核實轉滋流弊似不若慎選精細廉正者總司局務由臣等隨時切實考察仍照舊開單奏銷以歸簡易其每年成造各件撥用若干存留若干自可按件詳晰聲明至鎗礮隊口令一節前門鎗礮與後門鎗礮陣式口令大致相同而鎗礮用法彼此互異其前門鎗礮口令陣法已經前江蘇撫臣丁日昌於同治十年用漢文譯刻成書有圖有說上海機器局譯刻克鹿卜後膛礮法天津軍械所譯刻克鹿卜小礮簡本操法均已



印發各營令將弁兵勇日事講習其已譯木刻之德國破隊馬操  
法及續譯各書應飭令各營各局人員隨時擇要妥細辦理俾將  
弁人等於外洋兵法用器一律通曉以昭慎密而利軍行以上各  
節臣等往返函商意見相同謹合詞恭摺由驛履陳伏乞

皇太后

皇上聖鑒訓示謹

奏

請豁免民欠片

光緒四年七月初二日

再直隸州縣向有民欠光緒元二三年糧租照例應即帶徵惟係頻年災歉遞積而成現當大旱之後小民力盡筋疲斷難再完舊欠卽毘連災區及順天所屬地面亦因收成歉薄糧價昂貴民力均形拮据若循舊帶徵旣於庫款無補且致胥吏藉端追索重累閭閻所關於民生非淺伏查光緒二年閏五月因直隸旱象已成

欽奉

恩旨豁免同治十三年以前舊賦此次災荒更重自應仰體聖慈援案聲請俾根本重地人心益固除永平宣化遵化三府州屬未被旱災仍照例帶徵外擬懇

特恩准將順天保定正定河間天津順德廣平大名易州趙州深州冀州定州十三府州屬光緒元二三年民欠及緩帶徵正雜各

項糧租各案補徵銀兩屯米穀豆電課出借倉穀籽種口糧牛具  
學租等項全行豁免以示寬大如蒙

俞允臣卽督飭藩司故謹刊刻謄黃迅速分頒各屬徧行曉諭一  
面確查欠數咨部備案其奉

旨之日以後未頒謄黃以前輸納者卽抵本年正賦務使實惠普  
霑不准官吏絲毫捏混理合會同兼管順天府府尹臣萬壽黎順

天府府尹臣彭祖賢附片陳請伏乞

聖鑒訓示謹

奏

四成稅留充機局經費片

光緒四年七月初二日

再准戶部咨招商局輪船稅前經奏明令江漢關自第六十八結起以二成專解部庫其餘八成再按十成計算以四成解部以六成留爲撥解京協各餉此外各關亦應照辦等因臣查天津自同治五年設立機器局仿製外洋軍火用意極爲深遠經崇厚奏奉諭旨准將津海東海兩關四成洋稅留充經費歷年遵辦在案嗣因創設招商局由華商自備輪船往來各口遂有商局輪船稅名目議令解部然初創時船數有限洋稅尙不至大虧向來洋商輪船往來北三口惟美國旗昌爲最多自前年招商局買併旗昌船隻後天津煙臺各口輪船生意多歸招商局攬載昔日之洋稅今成爲局稅若於提解部庫二成之外再將四成解部則機器局要需無著勢將坐廢查戶部會同總理衙門原議招商局稅分作四

六成係仿照洋稅四六成辦法江漢關四成洋稅向係解部是以該關四成局稅亦應解部津海東海兩關四成洋稅向充天津機器局經費與江漢關情形不同該兩關四成商稅自應照案仍充機器局經費近來天津機器局所造軍火除支應本省防練各營及調防他省各軍並儲備海防各項要用外如熱河察哈爾奉天吉林黑龍江等省征防各軍皆取給於此江南防軍並須歲撥火藥二三十萬磅銅帽千餘萬顆各路取用者較同治五年開局時愈增愈多而該兩關洋稅收數日絀連招商局輪船四成稅歲不過銀十五六萬兩核計不敷尙鉅若將此項有限之商稅提解部庫必須月請由部撥補以重軍國要需似亦非通籌出入緩急之宜臣於今年三月間議覆庶子黃體芳等請撥機器製造等費賑案內已聲明近年四成洋稅短絀連招商局四成稅併計軍火

局用仍形竭蹶無可分撥奏奉

諭旨該衙門知道欽此六月間總理衙門議覆御史歐陽雲請裁減機器等費案內以揆時度勢各項經費未能遽行裁減並查明臣奏津局所賴東海津海兩關四成洋稅連招商局輪船四成稅歲不過銀十五六萬兩並無如該御史所稱費用之多等因奉旨依議欽此是津局軍火必賴該兩關四成洋稅局稅爲專款未能裁減亦並未多費已蒙

聖明洞鑒自應仍將該兩關局稅四成與洋稅四成遵照歷次奏案一併留充機器局經費以顧海防根本免致貽誤軍需理合附片具陳伏乞

聖鑒敕下總理衙門戶部查照謹

奏

防營無庸撥換片

光緒四年七月二十三日

再臣欽奉六月二十日

寄諭有人奏分守城鎮之營官勇丁久於其地流弊滋多請飭酌定撥換章程等語著確查酌度奏明辦理等因欽此臣查直省地面遼闊防營本屬無多只能分路布置如靜海青縣滄州南皮東光一路向係樂字營汎地以滄州扼要適中為團操底營此外各路防營亦各有一定汎地營壘其汎地內分防哨隊本係隨時互調而彈壓緝捕尤須熟悉情形乃可得力若數月一換紛紛更調人地生疏難有實濟是以派駐馬蘭峪之通永馬隊練軍工程處王大臣來咨屬令不可調換如日久於其地恐與地方官民浹洽致生弊竇則各省旗綠營何莫不然殊有換不勝換之勢似在任用之得人不在駐紮之久暫樂字營統帶記名提督丁德昌人甚

樸實紀律嚴明從不干預民事惟遇委辦地方工賑要務則況瘁  
不辭前數年疊次督飭修防運隄並未請領經費保全民田廬墓  
不少今年自備資斧幫同辦賑尤能認真核實窮黎裨益頗多此  
次賑務營員襄理者不止滄州一處如河間各屬印委方粟請盛  
軍員弁幫同查放蓋該員弁多係鄉農出身能耐勞苦約束素嚴  
無官吏鋪排習氣專心悉力事事躬親實較地方官辦理尤速且  
有節省薪糈相率助賑者此皆官民所共見若不察事理不辨是  
非指爲流弊遽請改章恐非實事求是之意自應各循其舊無庸  
撥換免致紛擾理合附片覆陳伏乞

聖鑒謹

奏



燒鍋存糧無庸收買片

光緒四年七月二十三日

再臣欽奉三月二十日

寄諭御史孔憲毅奏直隸燒鍋各店約有屯糧四五百萬石請由直隸總督飭屬曉諭該商令將屯糧糶賣以平市價並設法運晉俾作賑糧等語是否可行著李鴻章酌度情形具奏等因欽此查直隸燒鍋前奉二月二十七日

諭旨飭禁即經臣與府尹臣出示曉諭遵照並令將存糧自行就地發售精平市價以濟民食續奉前因又經分飭各府廳州確查糧數旋據陸續詳覆半無存糧其有存者每家數石至數百石不等統計直境燒鍋存糧實無四五百萬石之多蓋歲荒糧缺隨買隨燒本鮮儲積且因粗糧不能久屯已經遵示糶賣是以存者益少而民食藉以流通市價因之大減至由直入晉之路山嶺峻險

患在難運而不思無糧該省疊次奉撥漕米及南北各省采購捐  
助賑糧現仍分途設法趲運無須再向燒鍋收買該商戶既停燒  
歇業亦不必令其捐糧助賑致涉擾累仍應聽其就地自售臣已  
隨時批飭各屬遵辦矣理合附片覆陳伏乞

聖鑒謹

奏

秋禾望收無庸勸貸片

光緒四年七月二十三日

再准戶部咨國子監司業寶廷奏直晉豫災廣賑繁請行分貸之法欽奉四月初一日

上諭所陳有無窒礙著各督撫等妥速籌議具奏等因欽此遵查直省前因亢旱成災賑需不足已奏明分地勸捐勸貸不拘銀錢糧米卽以本境所集之款接濟本境貧民捐者照賑捐章程給獎貨者由借戶於秋後陸續歸還業據各屬官紳遵照勸辦惟地方素稱瘠苦本少殷富之家又值積歲災歉每州縣勸集銀錢糧米合銀至萬兩以外者甚屬寥寥餘則數百兩或數千兩不等其不能勸助者居其大半體察情形勢難再行勸貸幸四月以後疊霽甘霖並蒙

恩撥漕米及南洋經費銀兩臣又竭力籌湊款項一面緘商東南

各省量爲集助先行設法借墊及時分散籽種口糧藉資撫輯現在賑事尙未截止而秋禾暢茂可望有收自不必再議分貸理合附片覆陳伏乞

聖鑒謹

奏

口外捐牛請獎片

光緒四年七月二十三日

再前因河閒等屬災重之區耕田牛馬宰竄殆盡耕作難興奏蒙  
恩旨賞撥察哈爾牧羣孳生馬三千匹俾資力田之用旋經部統  
臣穆圖善飭據商都太僕寺兩翼牧羣總管挑選齊備正值草茂  
畜壯之候臣已派員籌撥口分盤費前往領解一面飭屬議定分  
給貧農章程以便隨到隨放在案惟各災區貧農較眾核計馬數  
不敷分散聞張家口內外滿蒙旗民牧養牲畜素稱蕃盛頗願捐  
助牛隻當經派委知縣查宗仁前往稟商穆圖善會同旗民各官  
妥爲勸辦照案給獎穆圖善念切鄰災籌顧大局各官民亦交相  
勸勉其樂輸將現據委員稟報計已捐牛一千六百餘隻尙有續  
捐者約其可得三千隻上下業飭分批起解進口及時撥放應用  
實於荒政裨益匪淺查察哈爾所屬歷年因軍需報捐駝馬計價

核獎之案駝每隻作價銀三十兩馬每匹作價銀十二兩近因口  
內荒歉滿蒙人等生計維艱該處牛價較長經臣酌中核定每牛  
一隻合實銀十四兩先給實收俟捐竣援照成案另行開單奏懇  
恩施從優給獎以示鼓勵合先附片具陳伏乞

聖鑒敕下戶部理藩院衙門查照謹

奏

外省捐局變通整頓摺

光緒四年七月二十三日

奏為外省捐局亟宜變通整頓改吝獎為奏獎以杜弊端恭摺仰祈

聖鑒事竊山西河南上年大旱成災需賑繁巨經戶部議准仿照黔捐章程於各省設局收捐其各省分局歸晉賑之款統由直隸奏咨請獎自奉行至今已逾半年惟丁日昌經辦廣東之潮州等處並福建之臺灣捐數暢旺奉天次之然皆由該將軍督撫及地方官紳竭誠勸導始克有濟可暫而不可久可一而不可再此外賑捐各局收數寥寥臣始末悉其故有謂各省捐生皆為黔捐移獎所羅致是以不能踴躍當於本年二月開咨商戶部旋准鈔錄光緒三年七月議復貴州撫臣奏改移獎章程一案咨復到直臣猶未能深悉其中竅要隨時留心察訪始知近日部章條理周密

而攬捐之號商卽緣周密之部章以爲奸請申言其故查外省捐輸之案奏獎歸吏部發照咨獎歸戶部發照凡咨獎之案不准零星單咨必須彙集多名造具清冊編列次數始予核辦如彙冊內業已有名因銀數與例章不符奉部批駁續經移獎他人者查其移獎之人與原捐之人姓氏籍貫相同准其在部具呈核辦其姓名籍貫不同仍由原捐省分或總局或分局詳請咨部核辦此現行部章實部臣防弊之苦心也乃攬捐之號商稔知條例又以各省捐輸惟滇黔准搭餉票而黔省分局尤多於是預赴黔省以賤價購集餉票任意捏造姓名向黔省各分局報捐又故意減寫捐數爲部議必駁之券迨部駁後再行移售別人有籍貫姓氏相同之駁案卽在部呈請移獎其不同者赴黔捐各分局請咨報部移獎黔局委員利其招徠遂通融給予咨文每借他人獎案預請咨



文存局遇有移獎竄入其中於是攬捐之商如取如攜頭頭是道而利權全歸中飽矣此等弊端雖未能指實黔省何局委員何人然人言嘖嘖必非無因在黔省現時情形餉源奇絀善後方殷舍捐輸別無良策而勸捐委員積習已深尾大不掉所以光緒三年七月開撫臣黎培敬有請停止分局移獎之奏在部臣檢查檔案以爲防弊章程已密無庸輕議更張皆爲慎重捐務起見而不知名實固迥不相符也現在滇黔捐局一時固不能裁晉豫兩省招集流亡籌辦善後在在需款其賑捐均經各該撫臣奏准展限若不變通整頓竊恐互相排擠流弊愈多不但晉豫賑捐毫無實濟卽滇黔餉捐亦必江河日下臣通盤籌畫竊以爲咨獎則挪後移前委員易上下其手督撫亦防不勝防奏獎則絲毫不能掩飾擬請將外省捐局無論何省捐輸悉改咨獎爲奏獎其有奏案未到

僅止者送捐冊者一概暫停核獎惟奏案之中必須變通向章者計有三端一發照須酌改也奏獎之案若仍歸吏部發照則由戶部核議轉咨吏部有需時日捐生必多不便請將奏獎之案亦由戶部發照庶捐生隨時領照毫無不便而同一部照在吏在戶於公事毫無出入一繕單須酌改也外省奏獎若概繕清單則報捐監生從九銜者動輒數千百名繕單既覺煩瑣奏獎必致稽遲請於奏獎摺內僅聲敘報捐實官者若干名銜封若干名貢監若干名改獎移獎若干名無庸繕具清單另將詳細清單咨送戶部一出奏之省分須酌改也查外省距京有遠近卽奏報有遲速若概由本省出奏則滇黔距津遙遠必致向隅擬請無論何省捐案查係在何省設局卽由設局省分之督撫出奏如此則發照無慮其稽延繕單無慮其累贅出奏無慮其遲滯而實事求是捐一名卽

得一名之用所有暗減搶售移花接木之弊不禁自除目下直隸捐局係爲接濟晉賑於直省毫無不相涉滇黔捐局更於直省無涉臣爲通籌滇黔晉豫四省捐務大局協助部臣剔弊起見仰懇特旨允准

敕部查照恭候

命下由臣通行滇黔晉豫及設立分局各省督撫臣一體辦理  
合恭摺具陳伏乞

皇太后

皇上聖鑒訓示謹

奏

葉廷眷會辦招商局片

光緒四年七月二十三日

再輪船招商局關繫緊要滙局尤商務總匯之區原派各員多有  
經辦事件分投查察未能常川駐局現僅道員徐潤駐滙經理雖  
無貽誤而責任綦重頭緒太繁必須遴派明幹公正大員會同籌  
辦切實整頓以昭周密查有二品銜江蘇候補道葉廷眷廉正樸  
直條理精詳實心爲公能任勞怨歷任松防上海南匯各丞縣實  
缺總辦江蘇海運局於洋務漕運各機宜均甚熟悉商局利病情  
形亦所素諳堪以委令總辦上海招商局會督原派各員唐廷樞  
徐潤等將南北各口總分各局攬載進漕用人一切事宜盡心講  
求力籌整頓核實樽節以期興利除弊涓滴歸公庶中國商務可  
以自立官本商股不至虧缺除檄飭遵辦外謹會同南洋大臣兩  
江督臣沈葆楨附片陳明伏乞

聖鑒謹

奏

准軍裁勇就餉摺

光緒四年八月十八日

奏爲留防淮勇軍需日形短絀通盤籌畫疊飭各軍酌裁勇數以就餉項而顧防務恭摺具陳仰祈

聖鑒事竊於本年五月內准兵部咨會同戶部議奏各省留防勇丁均應酌量裁減請

旨飭下各該省督撫通盤籌畫悉心稽核總期省一分軍餉卽紓一分民力統限於文到一月內迅將所有防勇陸續裁汰以半年爲限統裁十成之一將來報銷時戶部卽照此次所定期限減成核算其裁存勇數若干月需餉銀若干均令於此次裁定後分晰專摺奏明以備查核至此後應如何續裁之處仍令隨時相機辦理等因具奏奉

旨依議欽此

臣

查直隸提鎮各標練軍本係經制之兵抽練成隊

或分防要地或調駐庫倫奉天各處實屬無從裁減自可無庸置議其留防淮軍水陸馬步勇丁截至上年十月底止實存七十八營十二哨有零分紮直隸山東江蘇等省籌辦海防江防各營月餉專恃蘇滬釐金淮南鹽釐及江海江漢兩關洋稅爲大宗川鄂浙江等省協餉次之前因餉源枯竭各處額撥餉款未能按月照解已於未准部文之先自上年十一月及本年三月兩次通飭洋鎗步隊各營每棚抽裁正勇二成計其裁減五千二百餘名已不止如部議統裁一成之一正在具奏聞接准部咨臣復悉心稽核本年各處額撥月餉較前尤爲短絀刻已八月中旬蘇滬釐金四月分額餉尙未解清各局鹽釐分解無幾各關六成洋稅又懸而無著在各該省竭蹶輸將而收數日少撥款日增加以晉豫旱荒協撥賑需及改撥京餉迫不容緩遂致額撥淮餉遷延套搭積欠

愈多淮軍分防南北收省擇要扼紮兵分則力單餉絀則用匱實  
有支持不下之勢臣治軍幾三十年兵餉兼辦困苦艱難久經身  
親其境非不欲裁營節餉早圖歸宿無如中原軍務雖清海防關  
係重大未可過於空虛緩急無備諒在

聖明洞鑒之中部臣內外兼籌亦應計慮及此現臣所部除馬隊  
水師各營人數本少及駐紮上海吳淞之武毅右軍五營專守海  
口礮臺均難裁減外卽勇數稍多者如盛軍鎗礮步隊十六營駐  
紮津郡新城附近扼守北洋門戶拱衛

畿疆兼於海灘荒地試辦屯墾武毅慶字兩軍洋鎗步隊二十一  
營分紮江蘇之江陰靖江甯浦浦口等處護守沿江南北兩岸礮  
臺銘軍鎗礮步隊十四營駐紮山東張秋鎮爲南北洋海防策應  
之師以上各營若僅操練巡防彈壓地方未見其少設遇有事之



秋仍屬不敷分布且自籌辦海防以來臣飭各軍換用後門鎗添練礮隊仿照泰西陣式操法精益求精各將領目擊時艱尙能堅苦經營歷久不懈原期未雨綢繆力圖自強之計亦未便遽議裁汰惟刻下餉源異常支絀無論如何撙節竄屬不敷周轉若不通盤籌畫量入爲出誠恐將士枵腹荷戈因飢譁潰爲患更甚又不得不權衡輕重酌籌變通辦法今擬於盛軍鎗隊內酌裁五營銘軍鎗隊內酌裁四營武毅軍鎗隊內酌裁三營慶軍鎗隊內酌裁二營其裁十四營從本年九月分起籌給欠餉分飭各統將陸續查道合之先裁二成正勇其計減去一萬一千八百餘人每年約省餉銀六十餘萬兩至現留淮勇二萬八千九百餘名兼顧南北數省防務地段太廣兵力極單以口下情形計之似難續議遣撤然每月仍需餉銀二十餘萬兩江蘇湖北川浙等省額撥淮軍的

餉必須查照上年撥解之數按月源源解濟不得再有絲毫遞減  
短缺庶可拯飢軍而維大局所有淮勇軍需短絀現籌裁兵就餉  
緣由謹繕摺具陳伏乞

皇太后

皇上聖鑒訓示謹

奏

李鳳苞兼管學生采辦等事片

光緒四年八月十八日

再准總理各國事務衙門咨稱欽奉

上諭候選道李鳳苞著賞加二品頂戴署理德國欽差大臣等因欽此竊查道員李鳳苞經臣等於光緒二年十一月奏派監督帶領開廠生徒赴英法兩國學習水師製造駕駛之法並令兼查前赴德國學藝武弁本年七月閒又經臣等奏派李鳳苞就近在外洋采辦軍火原因李鳳苞練達勤能才大心細不致貽誤該員出洋兩年以來周歷英法德三國逐事留意考究屢次函報經辦學生習藝諸務甚有條理現既奉

命當理出使德國大臣計必迅赴伯靈都城接任所有臣前派往德國學藝之武弁七人業由李鳳苞察看將不甚得力之卞長勝朱耀彩於本年三月撤回現在該國軍營僅有五人均距德京切

近自應仍由李鳳苞督查功課其閩廠派赴英法學生係責成李鳳苞會同洋監督日意格經理目下布置就緒學藝亦有進益實難遽易生手聞由德往英法輪車輪船不過一日夜可到李鳳苞情形既熟但派得力幫辦一二人分駐照料遇有要事仍可親往商辦來回不過數日似於使事無礙至該員署理公使應自接任之日起照章支領公使薪俸其監督學生新費自無庸由閩另支嗣後所用幫辦薪水及來往查察雜費仍准酌量核實開支由該大臣隨時移會船政大臣查核至采購外洋軍火一節駐洋使臣本應與聞其事李鳳苞曾在各處實力探討頗知奧妙德國軍器甚精臣等近年購用不少自無難就近察訪卽英法各工廠聲息易通亦可隨時考較妥商辦理將來會紀澤出使英法該大臣於軍事素有閱歷閩廠學生及采購軍火各事更應互相考察

遇事商籌以助李鳳苞之不逮所有擬令李鳳苞暫行兼管學生  
采辦各緣由除分咨查照外謹會同南洋通商大臣兩江督臣沈  
葆楨閩浙督臣何璟船政大臣督福建撫臣吳贊誠合詞附片具  
陳伏乞

聖鑒訓示謹

奏

津局續收晉賑數目摺

光緒四年八月十八日

奏爲津局續收過各省官紳商富捐助晉賑銀兩及米糧合銀數目恭摺奏報仰祈

聖鑒事竊照山西省上年旱災甚廣待賑孔殷經撫臣曾國荃奏准於直隸江蘇安徽湖北湖南福建廣東廣西四川浙江江西等省勸捐接濟並經戶部議覆統歸直隸請獎仿照天津賑捐章程辦理臣卽奏派督津海關道新授按察使丁壽昌等在津設局籌辦一面知照各省並派員分投勸捐嗣又奏准戶部照黔章推廣新捐以裨賑款經臣查明各省凡係好善樂助及按業按貨勸集者與照黔章指捐情形不同仍照天津賑捐章程請獎已將開局起至今年正月底止收過各省官紳商富應照津章請獎捐數奏報在案茲自今年二月起截至七月底止續收前順天府尹新授江

西藩司彭祖賢署福建巡撫船政大臣吳贊誠江甯將軍穆騰阿  
京口副都統海瑛翰林院編修張人駿戶部坐糧廳郎中聯興並  
各省官紳商富集勸捐助暨出洋官商助款其實銀三十四萬六  
千一百七十七兩八錢三分三釐五毫二絲又捐糧合銀二萬八  
千九百八十四兩三錢五分統計收捐銀三十七萬五千一百六  
十二兩一錢八分三釐五毫二絲均應照天津賑捐章程請獎所  
收銀糧或轉解晉省濟用或爲轉運糧石經費將來統歸山西彙  
總報銷至請獎事宜部議統歸直隸請獎原爲迅速邀獎起見現  
在體察情形若由各省造冊遞津再由津局彙核詳辦填照遞往  
路途遙遠輾轉需時捐生轉多稽候應由臣咨明各報捐本省督  
撫府尹卽按照已經奏報捐數各歸各省就近飭取履歷查照天  
津賑捐章程一面填照給領一面彙奏給獎造冊咨部以期便捷

所有津捐章程及山西寄到空照統由臣咨送各省如空照不敷填用由各省咨明部監續發據津局司道具詳前來臣覆核無異理合會同山西撫臣曾國荃恭摺具

奏伏乞

皇太后

皇上聖鑒敕部查照謹

奏



韓超請 宣付史館摺 光緒四年八月十八日

奏爲已故在籍大員功績卓著懇

恩宣付史館立傳恭摺仰祈

聖鑒事竊照前署貴州撫臣韓超於光緒四年四月初二日在昌黎縣原籍病故據伊孫生員韓方炳繕具遺摺到臣求爲代遞伏查韓超於道光二十二年由副貢生就職州判揀發赴黔積功擢至道員咸豐十一年十一月奉

旨賞給二品頂戴署理貴州巡撫其初爲原任湖北撫臣胡林翼所知謂其沈勇慷慨雄心遠略可爲名將可爲良吏嘗從胡林翼擊粵賊於懷遠平烏沙苗於九萬寨擒獨山土匪楊元保所向有功桐梓賊楊瀨之圍遵義也滇黔兵壁城下者數十營久未得聞韓超馳至冒雨疾戰立解城圍進攻雷臺山賊巢破之楊瀨潰走

晝夜窮追卒殲之於葛章司厥功甚偉黔中自咸豐六年後上下  
游州縣大半淪陷思州以北及石阡銅仁思南諸郡爲教匪鎮遠  
以南及黎平都勻諸郡爲苗匪韓超以孤軍指挂其閒使賊不得  
合併遏其由澗下沉之路遮蔽湖南不至如粵匪之蔓延爲害則  
又超之功也韓超賦性剛直忍苦習勞在官在軍儉約刻厲有非  
尋常將吏所能堪者在黔近二十年大小六百餘戰往往當賊眾  
數十萬糧盡援絕之時左右死傷略盡而喋血鏖鬪卒以復振胡  
林翼疏請假以事權前湖南撫臣駱秉章亦言其廉樸耐苦能得  
民苗之心爲之籌濟月餉其在署巡撫任內適值餉源匱絀兵士  
飢疲馭悍將任良吏噉走粵逆石達開大股攻克尙大坪玉華山  
兩賊巢肅清大定安順遵義思南銅仁諸郡其勞苦功高黔中人  
士至今稱道弗衰查黔省被兵最久白胡林與首倡練勇擊賊稍

能自立及其奉調赴楚黔事益艱而尚能支撐十餘年俟粵逆蕩  
平移師援剿以至底定者皆文武諸臣力戰之功如提督孝順趙  
德光按察使福興及韓超其最著者而超在事尤久茲以老病歿  
於牖下合無仰懇

天恩准將前署貴州撫臣韓超生平戰蹟

宣付史館立傳以彰蓋績由

逾格恩施除將韓超遺摺附遞外理合恭摺具

奏伏乞

皇太后

皇上聖鑒訓示謹

奏

燒鍋開禁片

光緒四年八月二十九日

再臣前因畿疆亢旱糧缺價昂奏請暫禁直順各屬燒鍋以濟民食並聲明俟秋成豐稔仍准開燒依舊納稅欽奉本年二月二十七日

上諭著嚴飭地方官即將燒鍋一律禁止俟年穀豐稔再照舊章辦理等因當與府尹臣出示曉諭嚴飭各屬一律禁止在案自六月以後霖霖甘霖田禾甚形暢茂雖秋初陰雨較多間有被水被蟲之處不過十之一二統計收成約有七八分現在新糧上市價值平減且到處有糧乏人承買貧農當災歉之後房屋衣具半已無存專指家食所餘難賣得價及時置備竟有穀賤傷農之病若弛燒酒之禁則銷路可以稍暢市價不致過減亦足以資調劑夫糧缺時禁燒鍋所以救荒裕食糧多時准開燒所以平價利民皆

爲因時制宜起見自應遵照年穀豐稔循舊辦理之

諭奏請將順直各屬燒鍋商戶領有部照者准其開燒自奉

旨之日起完納部稅仍酌照部議此後但許歇業永遠不准新開

以示限制理合附片具陳伏乞

聖鑒訓示謹

奏

淮軍軍需報銷冊

光緒四年八月二十九日

奏爲淮勇軍需自光緒二年正月起到至十二月底止收支款目造冊報銷恭摺仰祈

聖鑒事竊照淮勇軍需前截至光緒元年十二月底止業經列爲第四案報銷於光緒三年六月十九日具

奏奉

旨該衙門知道單併發欽此伏查淮軍分防直隸保定及天津各海口護衛親軍盛仁馬步水師並各臺局護運糧餉軍械共計三十三營提督劉盛休所部銘字馬步全軍十七營由山東濟甯州調紮張秋一帶爲南北洋策應之師又福建陸路提督唐定奎統領銘武步隊十三營與直隸正定鎮總兵吳長慶所統慶字親兵八營及續已裁撤劉玉龍開花隊一營均調防江蘇分駐沿江

南北岸礮臺並分紮上海及吳淞海口之武毅右軍五營駐防徐宿之馬隊五營統歸淮勇軍需案內彙冊請銷今自光緒二年正月起截至是年十二月底止列爲第五案所有營哨官弁員名勇夫總數征防處所先經造冊分咨軍機處戶兵二部備查至陸軍水師各營所支薪費口糧正雜各款並柴薪斤重價值駝騾喂養均循前案楚軍營制並

奏定章程及准銷成案接續造報湘平折實庫平仍扣雜款一分平餘又馬隊倒補馬價係照駐紮內分營驛例價分別核給采辦製造工價水陸轉運糧餉軍火等項雇用車船夫工價腳核計斤重程途里數悉照軍需則例應屆准銷各案核實支發飭將截至光緒二年底止收支細數分晰造報今據金陵報銷局司道等詳稱舊管項下上屆截至光緒元年十二月底止實存銀七十三萬

三千五百一十七兩六錢有奇新收項下總計浙江四川兩省協餉並提撥湖北江蘇藩關釐局軍餉兩淮鹽釐及收回上屆登除歸天津海防支應局造銷洋軍火價值又江蘇留防軍需案內登除劃撥銀款同本案扣存平餘等項共銀三百六十八萬八千八百八十三兩六錢有奇內登除請銷補放各營光緒元年十二月底以前欠餉又附請專案

奏銷洋鎗礮隊教習辛工並購買外洋軍火價值金陵暨天津行營機器製造二局工料用款等項共銀六十萬三千五百九十五兩七錢有奇外實計收用銀三百八十八萬六千一百八十三兩三錢有奇開除正雜各款遵照部議酌定軍需報銷章程各歸各部核銷計應歸戶部核銷銀二百八十三萬八千五百二十六兩五錢有奇應歸兵部核銷銀五萬五千八百九十八兩有奇應歸工部



核銷銀一十二萬六千九百九十六兩六錢有奇統共請銷銀三百二萬一千四百二十一兩二錢有奇應存銀七十八萬四千七百五十九兩一錢有奇已接支光緒三年正月起淮軍馬步水師營哨正雜餉項並購製外洋軍火器械價值工料等用歸於後案舊管項下滾接造報等情具詳請

奏前來臣查淮軍分調直東江蘇等省沿江海口外壯聲勢內備緩急實為緊要防務此次造報馬步水師各營勇丁遵照部咨開報花名清冊正雜款項概發湘平折實庫平報銷仍扣雜款一分平餘均係循照歷辦成案實用實銷並無絲毫浮圖除將細冊分咨各部並飭將以後用款趕緊接續清理造報外所有光緒二年正月起截至是年十二月底止淮勇軍需收支款目造冊報銷緣由謹會同南洋通商大臣兩江督臣沈葆楨專摺具

奏前繕清單恭呈

御覽伏乞

皇太后

皇上聖鑒謹

奏

淮軍交涉洋務報銷片

光緒四年八月二十九日

再查淮軍各營洋鎗礮隊教習通事工匠人等辛工天津行營機器製造局工料及購買外洋軍火等項截至光緒元年十二月底止金陵機器局用款截至光緒元年十月底止業經附

奏准銷在案今自光緒元年十一月二年正月起統截至二年十二月底止淮軍各營洋鎗礮隊教習通事工匠人等辛工礮費等項銀五萬八千八百五十七兩五錢有奇購買外洋新式鎗礮車架箱具子彈門火等價銀三十六萬一千一百四十二兩有奇金陵暨天津行營機器製造兩局委員薪糧工料建修廠屋用款等銀一十八萬三千五百九十六兩一錢有奇以上總共請銷銀六十萬三千五百九十餘兩茲據該司道等按款復加查核均係奉文嚴實飭發並無絲毫浮冒另造細冊詳請附

奏前來 臣查前項各營洋鎗礮隊教習通事工匠人等辛工購買料物洋軍火價值各款皆與洋人交涉無例可循仍應照案據實請銷除將細冊咨送總理衙門戶兵工部查核外伏乞

聖鑒謹附片具

奏

謹將光緒二年正月起截至是年十二月底止淮勇軍需案內收支正雜各款繕具清單恭呈

御覽

計開

舊管

一上屆淮軍第四案軍需截至光緒元年十二月底止實存銀七十三萬三千五百一十七兩六錢二分四釐一絲八忽六微八纖

新收

一收浙江省協餉共撥解銀六萬兩

一收四川省協餉共撥解銀九萬兩

一收湖北軍需局共提撥沙平銀一十一萬兩共合湘平銀一十

萬九千九百二十三兩

一收湖北江漢關其提撥四成洋稅庫平銀二十二萬兩合其湘平銀二十二萬七千五百六十八兩

一收湖北江漢關其提撥六成洋稅關平銀三十三萬兩其合湘平銀三十三萬五千五百四十四兩

一收蘇州藩司庫其提撥銀一十六萬五千兩

一收江南海關其提撥銀六十萬兩

一收江蘇捐釐總局其提撥釐捐銀一百七萬一千二百九兩二錢二分八釐八毫一絲

一收鄂岸鹽釐其提撥銀一十五萬八千五百一十二兩二錢五分六釐一毫一絲二忽五微

一收湘岸鹽釐其提撥銀三萬六千四百兩

一收西岸鹽釐其提撥銀四十七萬九千五百六十八兩九錢七

分七釐五毫

一收皖岸鹽釐共提撥銀九千七百三十三兩六分

一收回上屆淮軍第四案登除撥歸直隸省海防支應局入收購  
買洋軍火價內除歸該省收銷外計撥還其銀三十六萬五千四  
百七兩九錢一分二釐九毫五忽

一收江蘇留防軍需報銷第五案內登除撥歸銀二千九十九兩五  
錢一分二釐八絲一忽

一收本案轉運價腳采辦製造等項其扣存平餘銀一千五百二  
兩五分三釐一毫九絲五忽七微四纖

以上管收二項共庫平銀三百七十七萬二千九百四十一  
兩六錢二分四釐六毫二絲二忽九微二纖

湘平銀六十七萬三千三十五兩折合庫平銀六十四萬九

千四百五十九兩六錢一分五釐九毫四絲一忽三微二纖  
共計庫平銀四百四十二萬二千四百一兩二錢四分五毫  
六絲四忽二微四纖

登除項下

一附列本案專冊請銷補放淮軍各營光緒元年十二月底以前  
欠餉銀一萬二千六百二十五兩六分九釐四毫八絲九忽

一附列本案第一冊請銷淮軍各營洋鎗礮隊教習通事人等辛  
工儼費等項銀五萬八千八百五十七兩五錢五分一釐八毫六  
絲七忽

一附列本案第二冊請銷購買外洋軍火等項價值銀三十六萬  
一千一百四十二兩七分一釐八毫四絲七忽

一附列本案第三冊請銷金陵天津行營機器製造各局委員薪



糧工匠工食購買料物建修廠屋用款等項銀一十八萬三千五百九十六兩一錢六分八釐四毫四絲七忽

以上登除並附列請銷各款其庫平銀六十一萬六千二百二十兩八錢六分一釐六毫五絲

實計收用庫平銀三百八十萬六千一百八十兩三錢七分八釐九毫一絲四忽二微四纖

開除

一第一冊請銷淮軍駐防直隸省天津保定馬步各營統領營哨官弁勇夫薪糧等項內歸戶部核銷薪費口糧馬乾等項銀一百一十萬一千五百七兩八錢六分六釐一絲二忽兵部核銷倒補馬價銀一千七百一十九兩五錢七分九釐二毫七絲二忽

一第二冊請銷淮軍駐紮山東張秋等處馬步各營統領營哨官

弁勇夫薪糧等項內歸戶部核銷薪費口糧馬乾等銀五十四萬九千一百四十四兩八錢九分三釐九毫四絲九忽兵部核銷倒補馬價銀三千一十兩七錢一分一釐一毫八絲四忽

一第三冊請銷淮軍駐防江蘇省馬步各營統領營哨官弁勇夫薪糧等項內歸戶部核銷薪費口糧馬乾等銀九十六萬三千八百七十兩六錢三分四釐一毫七絲九忽三微兵部核銷倒補馬價銀六千八百兩一錢五分四釐三毫九絲五忽四微

一第四冊請銷督標水師各營哨官弁勇丁薪費口糧等項係歸戶部核銷銀七萬八千三百二十三兩七錢一分三釐二毫一絲一第五冊請銷隨營辦事支應各差文職官員薪糧等項係歸戶部核銷銀一萬八千八百三十一兩四錢一分九釐四毫七絲三

忽

一第六冊請銷隨營先鋒差遺武職官弁薪糧等項係歸戶部核銷銀一萬八千六百一十九兩八錢九分七釐七毫一絲三忽

一第七冊請銷准軍馬步各營柴草斤重價值係歸戶部核銷銀七萬七千六百六十三兩九錢七分九釐七毫三絲五忽

一第八冊請銷准軍馬步各營駝騾購車喂養車輛雇價等項內歸戶部核銷駝騾購車喂養銀三萬五百六十四兩一錢二分二釐三毫五絲八忽兵部核銷車輛雇價銀一萬六千三百八兩一分八釐九毫一絲三忽

一第九冊請銷准軍各營哨弁勇夫亡故卹賞係歸兵部核銷銀三千五百三十二兩七錢六分七毫八絲四忽

一第十冊請銷各臺局所水陸轉運餉械車價水腳夫役工食等項係歸兵部核銷銀二萬四千五百二十六兩七錢七分八釐七

卷三絲二忽

一第十一冊請銷采辦物料製造軍裝器械工價並油艚船隻經費等項係歸工部核銷銀一十二萬六千九百九十六兩六錢九分一釐九毫五絲六忽

以上第一冊至第十一冊止其歸戶部核銷銀二百八十三萬八千五百二十六兩五錢二分六釐六毫二絲九忽三微兵部核銷銀五萬五千八百九十八兩三釐二毫八絲四微工部核銷銀一十二萬六千九百九十六兩六錢九分一釐九毫五絲六忽

統計十一冊共請銷銀三百二萬一千四百二十一兩二錢二分一釐八毫六絲五忽七微

實在

存銀七十八萬四千七百五十九兩一錢五分七釐四絲八忽五微四纖

查前項實存已接支光緒三年正月准軍馬步水師營正雜款並購製軍火器械工價等用歸於後案舊管項下滾接造報理合登明

一光緒二年正月起截至是年十二月底止共欠發准軍陸勇水師各營餉銀四十六萬三千三百五兩六錢六分二釐六毫五絲一忽

查前項欠發續有補給另歸後案專冊開報理合登明

蘆鹽加價展限

光緒四年八月二十九日

奏爲直隸賑款不敷展收直岸鹽斤加價歸補遵

旨籌議辦法恭摺仰祈

聖鑒事竊臣欽奉七月二十六日

寄諭國子監司業汪鳴鑾奏直隸災區賑款不敷尙鉅請令長蘆  
鹽商將每斤加價二文捐出一年助賑其加價准予展限一年於  
該商毫無所損實爲有益之款等語直隸賑務未竣需款孔亟自  
應趕緊籌畫著李鴻章按照該司業所陳迅速籌議具奏等因欽  
此遵查直省自去秋至今辦理賑撫需用繁巨除撥湊捐濟外皆  
係設法暫行借墊現在雖有秋成而借墊之款不少善後之用尙  
繁必須妥籌歸補接濟汪鳴鑾擬推展蘆商賣鹽加價令其分年  
交足以爲歸還原借賑款及水利積穀等用洵屬有裨大局與臣

意見略同惟各岸賣價向未能一律照加若交限過促銀數較多亦無以紓商困當飭運司如山詳細籌議茲據該司詳稱長蘆直岸引鹽前經奏准加價二文係因成本太重商累太深稍資津貼與從前加價濟餉之案情事攸殊原議自同治十三年六月起至明年五月底五年限滿惟自加價以來初則灘鹽失收買價昂貴繼則直豫大旱河道淺涸運腳倍增且戶口流亡硝鹽徧地官引幾至停秤而一二殷實商家頻年在津捐銀捐穀施粥施餅未嘗稍遺餘力此次賑案復於通綱另捐銀八千兩議明按引攤扣以有限之加價實不能補無盡之虧賠是以愈累愈深有岌岌可危之勢查加價原案聲明五年後察勘停止今當大股之後流亡未盡歸復銷數尙不可知又有去今兩屆因災展緩之課須分年按成帶繳揆度商力必難稍紓卽無籌還賑款之舉亦未能停止加

價至汪鳴鑾原奏謂歲銷四十餘萬引可得加價銀二十萬兩係  
統直豫鹽引一律加價而言其實此項加價豫引不在內直引  
每年出庫不過二十餘萬道而實銷之鹽又非盡能加價一則產  
確之區百姓貪賤買食若官鹽加價勢難敵私一則累商運鹽到  
岸諸債蠟集往往減價求售以圖迅速統計每年所得無幾即直  
豫各岸原有之軍需加價豫岸原有之榮工加價亦不能一律照  
加是以蘆商皆目爲攤捐多已有名無實自道光二十八年清查  
以後凡舊商虧空課帑全責現商分攤交款已形喫重若再令驟  
捐巨款商力未逮轉於課帑有妨該司悉心酌核擬將此項直岸  
加價自明年五月限滿後請予照案展限五年無論其能否照加  
內價每年責令各商繳銀二萬兩五年共合十萬兩必須隨引呈  
交不准稍有延欠以爲彌補直賑不敷之款按春秋兩關報撥如



此酌量辦理賑款可期有蓄商力不致過窮而民間所加買價每人每月僅止一文有零亦無妨礙等情具詳前來臣查該司所詳皆係實在情形所擬辦法亦尙平允相應仰懇

天恩俯准照辦以裨賑項而恤商艱理合恭摺覆陳伏乞

皇太后

皇上聖鑒訓示謹

奏

鹽正課緩徵摺

光緒四年六月二十九日

奏爲長蘆各岸災荒引鹽運艱銷滯請將本屆正課酌照上年成案分成緩徵恭摺仰祈

聖鑒事竊據長蘆通綱商人屢以本年春夏運艱銷滯正課力難全完呈請調劑當經行司籌議詳辦茲據運司如山詳稱蘆岸引鹽向賴春秋兩運其銷售則以醬秋菜秋爲大宗春運濟醬秋之用秋運濟菜秋之用而醬菜兩秋銷數多寡總以歲時豐歉爲憑上年直豫大旱成災冬春又少雪雨禾麥兩季失收今歲春夏荒狀益甚閭閻愈形敝蘆岸災重之區如直省之河閒豫省之彰德衛輝懷慶各屬人民轉徙流亡十居七八官引幾至停秤其次重之區如直省之保定正定大名順德廣平深州冀州定州趙州易州豫省之開封陳州南陽許州各屬久旱以後糧價日昂硝鹽

徧地貧民取土煎售餬口富戶貪賤買食勢難嚴申腐禁因而官  
鹽銷數大減卽情形較輕及並未被災之順天永平遵化各屬當  
春關築運之際正值直晉豫三省賑糴並江浙海運漕米同時抵  
津分路轉輸急如星火各河船隻稀少無不擡價居奇六月間漕  
務告竣賑運稍鬆始得雇船運鹽由灘赴坨由坨赴岸盤生運熟  
碾轉需時是以糶秋失售日下雖有秋成但流亡未盡歸來荒蕪  
未盡墾種欲如平時之暢銷實無把握蘆屬直隸引岸一百八十  
餘處今年自二月春關起至秋關八月止過關之鹽僅八萬七千  
七百五十三道較之去年短至一半較之前數年則相去懸遠歲  
荒商困情形實非尋常可比蘆商本已疲累遭此奇災重形竭蹶  
若按名參革懸岸愈多轉致課款無著且課從鹽出旣極滯銷勢  
難責完全課口應分別情形輕重酌予調劑查上年正課係分成

緩徵將應緩者分作三年或五年帶徵其時運庫尚可墊解京協各餉今已羅掘一空無可再墊若照上屆成案分作三五年帶徵爲期較遠亦非慎重餉需之道該司悉心酌核除直隸豫省彰德衛輝並官辦各岸不計外擬將情形最重之直省河閒豫省彰德衛輝懷慶四府屬認辦額引各商本年十月奏銷應完光緒二年正課銀八萬六千七百十六兩五錢二分九釐先徵二成其餘八成緩至明歲醬秋菜秋後分作兩次補徵情形次重之直省保定正定大名順德廣平深州冀州定州趙州易州豫省開封陳州南陽許州十四府州屬認辦額引各商應完正課銀十八萬三千四百九十八兩二錢三分九釐先徵四成其餘六成緩至明歲醬秋後補徵順天天津遵化三府州屬認辦額引各商應完正課銀七萬八千二百四十六兩一錢九分九釐先徵八成其餘二成緩至明歲

將秋後補徵至本年長蘆奉撥各餉除榮工加價另案徵解不計外應解京餉銀二十五萬兩吉林黑龍江打牲烏拉等處餉銀七萬三千一百四十六兩八錢四分一釐七毫現按先徵二成四成八成核計其應徵銀十五萬三千三百三十九兩五錢六分屆時徵起除完解吉林黑龍江打牲烏拉等處餉需以贍邊軍外尙餘銀八萬一百九十餘兩先於年內解交部庫兌收下短京餉銀十六萬九千八百餘兩統於明歲備菜二秋補徵報解如此分別辦理商力藉可稍紓京餉不致懸絀等情具詳請

奏前來臣查農民以力田供賦商以行鹽納課田失收成則必緩賦以恤民鹽難運銷亦須緩課以恤商是以從前水旱災傷疊

奉  
恩旨緩課有案蘆商歷因攤認學課幣利交款加重成本倍增且

值頻年災歉本有積重難返之勢今大旱之餘運艱銷滯更甚於前自春關至秋關僅運鹽八萬七千餘包實爲歷來所未有該司擬將本屆應完正課酌照上年成案分成緩徵又恐緩徵之期較寬課款日久延宕議以明年醬秋菜秋爲限以期京餉不致懸絀於恤商之中仍不失慎重餉需之意尙能兼籌並顧舍此亦無以保全蘆綱大局相應仰懇

天恩俯准照辦藉紓商困理合恭摺具陳伏乞

皇太后

皇上聖鑒訓示謹

奏

李文忠公奏稿卷三十一